

## **Skupština Kantona Sarajevo**

Admela Hodžić, zastupnica u Skupštini Kantona Sarajevo

Sarajevo, 26.12.2024. godine - 18. Radna sjednica Skupštine Kantona Sarajevo

Bosna i Hercegovina  
Federacija Bosne i Hercegovine  
Kanton Sarajevo  
Skupština Kantona Sarajevo  
N/r predsjedavajućeg  
Vlada Kantona Sarajevo  
N/r premijera

### **ZASTUPNIČKA INICIJATIVA**

Na osnovu čl. 106. i 213. stav (1) Poslovnika Skupštine Kantona Sarajevo („Službene novine Kantona Sarajevo“, broj: 41/12-Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22, 17/22-Ispravka i 47/24) podnosim inicijativu Vladi Kantona Sarajevo da pokrene postupak stečaja i likvidacije firme „BAGS ENERGOTEHNIKA“ d.d. Vogošća kompanije koja se bavi proizvodnjom i distribucijom toplotne energije i distribucijom vode.

Također, da Vlada Kantona Sarajevo istovremeno započne proceduru osnivanjem novog javnog preduzeća koje će biti registrovano isključivo da izvršava usluge komitentima, odnosno ustanovama, institucijama, domaćinstvima i privrednim subjektima Vogošće iz djelokruga osnovnih djelatnosti za koje bude registrovano.

### **OBRAZLOŽENJE**

„BAGS ENERGOTEHNIKA“ d.d. Vogošća je osnovana 1974. godine s ciljem tehnološke podrške kompanijama u industrijskom kompleksu UNIS Vogošća.

Postojeće preduzeće „BAGS ENERGOTEHNIKA“ d.d. Vogošća, prema stanju koje smo do sada imali, ne služi za osnovne djelatnosti za koje je registrovano i samo narušava ugled i Vladi i Skupštini Kantona Sarajevo, zašto smatram da smo svi odgovorni i Uprava preduzeća i Vlada Kantona Sarajevo i Skupština Kantona Sarajevo.

Po strukturi kapitala, „BAGS ENERGOTEHNIKA“ d.d. Vogošća je dioničko društvo sa većinskim učešćem državnog kapitala (67% vlasnik Kanton Sarajevo), dok preostali dio vlasništva pripada Investicijskim fondovima i fizičkim licima. Kompanija u svom portfoliju posluje kroz dvije tehnološke cjeline:

- **Proizvodnja i distribucija toplotne energije i**
- **Distribucija vode za piće.**

Toplotnom energijom snabdijevamo potrošače na području Općine Vogošća (ustanove, institucije, domaćinstva, privredne subjekte), kao i kompanije koje posluju u krugu „Stara industrijska zona“ Vogošća. U svom poslovnom portfoliju imaju preko 600 kupaca. Sa izvorišta „Peračko vrelo“, distribuiraju vodu za potrošače na lokalitetu „Stara industrijska zona“, te vrše isporuke vode u sistem KJKP ViK Sarajevo.

### **MISIJA**

Obezbijediti pouzdano i stabilno vršenje komunalne funkcije komitentima na području koje pokriva naš operater, te uz kontinuirano unapređenje procesa proizvodnje i distribucije kao i kroz uvođenje novih tehnologija, doprinijeti unapređenju kvaliteta životne sredine.

### **VIZIJA**

Postati moderna, efikasna i specijalizovana kompanija u oblasti kojom se bavi, koja će kroz primjenu inovativnih rješenja i savremenih tehnologija u proizvodnji i distribuciji energetskih medija, biti u mogućnosti svojim korisnicima ponuditi kvalitetnu, modernu i ekološki prihvatljivu uslugu.

Preduzeće odavno ne ispunjava ni misiju ni viziju koja stoji na stranici Preduzeća čemu svi svjedočimo već odavno.

Samo nekoliko podataka iz posljednjeg dostupnog Izvještaja o radu za 2021.godinu:

Ukupni prihodi : 3.399.397 KM

Od toga pomoć iz Budžeta Kantona Sarajevo: 1.500.00 KM

Ukupni rashodi: 3.316.860 KM

Finansijski rezultat: 82.537 KM

**U izvještaju se dojadi kao povećanje prihoda, iako je bez pomoći Kantona očit gubitak prema prikazanim rezultatima. Pomoć ulazi u razliku kao finansijski rezultat, a jasno se navodi da su ista neophodna, obzirom da Društvo nije u mogućnosti servisirati obaveze iz tekućeg poslovanja, što je i prikazano u sljedećem poglavlju:**

### **Pomoć-dotacija iz Budžeta Kantona**

Iznos 1.500.000 KM u 2021. godini u ukupnim prihodima Društva, ima najveći procenat učešća 44,1%. Odnosili su se na pokrivanje dijela troškova priprema za grijnu sezonu

/ nabavka energenta – mazut/. U odnosu na plan su na indexu 100. Navedena sredstva u poslovnim knjigama knjiže se kao prihod-subvencija na koja Društvo plaća PDV, a ista su neophodna obzirom da isto nije u mogućnosti servisirati obaveze po ovom osnovu iz tekućeg poslovanja.

### **Izvor sredstava**

**Na dan 31.12.2021. godine, stalna sredstva iznose 6.624.540 KM,**

Čine ga kapital, dugoročne obaveze, kratkoročne obaveze i pasivna vremenska razgraničenja

Vrijednost kapitala Društva na dan 31.12.2021. g iznosi 3.702.628 KM.

- Dugoročne obaveze na dan 31.12.2021. god iznose 2.887.395 KM, a predstavljaju obaveze prema PU FBiH po osnovu zateznih kamata na potpisani sporazum o reprogramu.

- Kratkoročne obaveze iznose 2.709.247 KM i odnose se na obaveze prevashodno prema dobavljačima / 1.081.569 KM - energent/, dok preostali dio od 1.627.678 KM predstavljaju obaveze za plaće i naknade plaća, poreze i doprinose i druge obaveze.

**Ukupne obaveze Društva na dan 31.12.2021. godine iznose 5.596.642 KM.**

### **Najveći problemi**

1. Potpuno zastarjela, amortizirana, predimenzionirana i nerentabilna proizvodna i distributivna postrojenja stara preko 40 godina u koju se do danas nije investicijski ništa ulagalo, zbog čega se stepen iskorištenosti energije kreće oko indexa 50 Predmetna postrojenja su potpuno nepouzdana u pogledu kontinuiteta isporuke toplotne energije obozirom na starost, amortiziranost te nemogućnost obezbjeđenja rezervnih dijelova i opreme za popravke na sistemu.

2. Visok nivo akumuliranih obaveza Društva, pozicioniraju ga u kategoriju „dužničkog ropstva“, jer su sa aspekta ročnosti potpuno nepovoljna i sva su dospjela na naplatu.
3. Tužbe radnika protiv Društva, a tiču se neisplaćenih netto plata iz ranijeg perioda poslovanja /2013-2015 / neke presude su već izvršene /, a koje iznose 358.326 KM uvećane za iznos kamata i troškova postupka.
4. Koncesiona naknada koja iznosi skoro 30 miliona KM na ime zahvaćene vode sa izvorišta „Peračko vrelo“.

Ni Ugovor o izvođenju radova na rekonstrukciji kotlovnice i instalaciji toplotnih pumpi voda-voda i kotlova na prirodni gas preduzeća BAGS Energotehnika d.d. Vogošća iz 2023.godine u vrijednosti od 3.5 miliona KM nije ispunio ciljeve, a ciljevi projekta su omogućavanje toplotnog komfora korisnika usluga daljinskog grijanja, smanjenje potrošnje i troškova kao i smanjenje emisija stakleničkih plinova.

Očekivalo se da će koristiti od ovog projekta osjetiti građani Općine Vogošća kroz smanjenje potrošnje energije, a time i troškova grijanja, energetska nezavisnost i čišći zrak, tako da je ovo bila samo dobra vijest, jer bi se prestankom korištenja mazuta kao ekološki neprihvatljivog goriva očekivalo da će doći do značajnog poboljšanja kvaliteta zraka.

Zbog svega što se dešavalo posljednjih mjeseci i nesposobnosti da se Vogošćanima obezbijedi normalna isporuka toplotne energije, smatram da produžavanjem dalje agonije Vlade sa ovim javnim preduzećem sami sebi narušavamo ugled, a građanima uskraćujemo uslugu koju uredno plaćaju. Nameće se pitanje samo po sebi, ko će građanima vratiti novac i namiriti nastale troškove za alternativne energente koje plaćaju višestruko?

Penzioneri, djeca, socijalno ugroženi, svi ispaštaju zbog Uprave Preduzeća BAGS ENERGETEHNKA“ d.d. Vogošća, Vlade Kantona Sarajevo i Skupštine Kantona Sarajevo.

Molim nadležne da što prije razmotre ovu inicijativu i poduzmu sve neophodne mjere i radnje za njenu realizaciju.

Sarajevo, 26.12.2024. godine

Admela Hodžić